

Paulo Ena Marere

GALATIA

Haukia Herekiai

Puka Aona Irerena 'Abina

Rani weianai maearima kori'uaukia tohokia Iesu murinai te'au haukia hanona Iuda haukia. Iamo Iesu ehore Paulo iuhubeau haunai ebaona ba euhuna eao rama haeai haukia herekiai pou namona keiroro aina. Maearima bo'ona a'ikakauma haukia kipokia tebahaeamo. Iamo atetua apa'uana ha erama. 'Uaina maearima weiakia hanona Mose ena rauhuhu a'i teka'a ainakia haukia, matoha Iuda haukia Mose ena rauhuhu tika'aina 'abana, ba a'ikakauma haukiai teao aonai rauhuhu weiakia kateka'a ainakia 'ao aha'i? Maearima baika hanona ia tibahi ahinakia itare katea'ina Iuda haukia ekia hoahoa ihobonai, ba ia katehore Mose ena rauhuhu kateka'a ainakia.

'A Paulo ni'abi weiana hanona taba apa'uana aha'i, aika Iesu Keriso kaha a'ikakaumana hanona Tirama wairanai kahabero. Iuda haukia baika hanona teao weia Galatiai, ba tenuatae a'ikakauma haukia weia katebahi ahinakia Mose ena rauhuhu kateka'a ainakia. Aka neiana hanona Galatiai nirama ba Paulo pouna eona. Ua buonai puka neiana ererena, weiana ekia a'ikakauma mai ekia hoahoa kebaberon.

Kori'uainai hanona Paulo e'abi Tirama ehore ia etina'ana iuhubeau akana kebabaina. Haeamona e'abi maearima weiakia Iesu Keriso aonai tia'ikakauma haukia hanona Tirama wairanai tebero. Ba puka puanai hanona e'abi Keriso aika ki'a herenai eba'abaeana hanona Auba Robe kehore aika ke'uai ainaka, weiana aika hanona rani ikoinai hoahoa namokia maearima herekiai kahababai.

Puka Paipana Apa'uakia

- a. Roba iahu. (1.1-10)
- b. Paulo iuhubeau hauna mai ena hiabu. (1.11-2.21)
- c. Tirama ena aoko'o hoana pouna namona. (3.1-4.31)
- d. A'ikakauma haukia ekia bero mai ekia aka katebabai haukia. (5.1-6.10)
- e. 'Abi orekia. (6.11-18)

Banamo 'Abina.

1 ¹Au Paulo, Iuhubeau hau'u, aka neiana maearima a'i tebena'u 'ao a'i teuhuna'u, ia Iesu Keriso mai Hamana 'ariai ebamikiri muena Tiramana ohi teuhuna'u. ²Au uaho'abaka neia tamiaho ikoikiai atakiai a'ikakauma haumi Galatia hanona aonai marea ha ha aokiai tomiaho haumi narere benimi.

³Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho. ⁴Keriso kipona ena mauri ebaibeni aika eka ki'a paunai, ia hanona hanopaka ki'a obona neiana aonai kebamaurinaka, aika Hamaka Tirama enuatae ihobonai. ⁵Ua buonai Tirama ena nuabi kemiaho banaibanai. Amen.

Keriso Pouna Namona Ikupaianamo.

⁶Au ata'u ta'u huri heremiai hanona Keriso ena aoko'o hoanai eparinimi Tiramana abamo tohabo 'abaeana ia tuao pou haeai tehinana haukia herekia. ⁷Weiana hanona pou namona tohana aha'i. 'Eka neianai maearima aika tibabaoonimi pokina tenuatae Keriso pouna namona katebahaeaina. ⁸Ai 'ao kupa aneruna ha pema re'a, ia pou haeai ha peiroro aina ba pou namona 'uainai heremiai tairoro aina hauna terarua a'i teihobo raninai puma banaibanai kehoaina. ⁹Uainai tahinana hauna bariu haeamona nahina muena. Tai ha pou namona toa'ina hauna aha'i ia pou haeai ha keiroro aina raninai puma banaibanai kehoaina. ¹⁰Bariu au maearima ekia nuatae naka'aina? Aha'i 'akina. Tirama ena nuatae naka'aina. 'Ao maearima aokia kabaonamona taearana natabuna? Maearima aokia ibaonamona manuatea aina raninai, au hanona Keriso ena ta'ara ia'ina hau'uai a'i paeao.

Iuhubeau Hauna Paulo Kipona Kikipana.

¹¹Uaho'aba'u e, au nanuatea kato'jobina pou namona airoro aina hauna hanona maearima ena 'jobiai a'i emai. ¹²Maearima ha herenai a'i a'ina 'ao tai ha a'i eba'jobina'u, ia Iesu Keriso here'uai ebawaira tinana hauna a'ina.

¹³E'u mauri 'uainai Iuda haukia ekia a'ikakauma taearanai amiaho raninai ababaina hauna 'uruna aba to'ona, Tirama ena marea haukia a'oata ki'a bahanakia anuatea kabapururunakia. ¹⁴Au ihaburi'u haukia Iudai bo'okia baiatakiai Iuda ekia a'ikakaumai au hanona aotipa ki'a baha, mai 'aba'abamai ekia hoahoa hanona anuateaei ki'a bahanakia.

¹⁵Ia hina'u nuanai a'i arama baha aonai Tirama aba etina'ana'u, ena aoko'o hoanai eparina'u, ia ena nuatae ai ¹⁶nahuna ebawaira tinana here'uai, pouna rama haeai haukia herekiai kairoro aina, weiana hau

ha ohi a'i tarobahu aina. ¹⁷Ao a'i mo aeao Ierusalem, iuhubeau haukia 'uaikia a'i aihanakia, ia beronai mo aeao Arabia, muriai haeamona aeao Damaseko. ¹⁸Ihau aihau teore murinai, au akara'au aeao Ierusalem Petero herena ta'abi'abi, weia tamiaho wapu harau haea ima. ¹⁹Weia iuhubeau haukia haeai ha a'i aihana, Obiapaka hatina Iakobo mo ikupaiana aihana. ²⁰Tirama wairanai 'abi neiana arerena hanona tohana ia a'i nabai'oi.

²¹Murinai amikiri hanona Suria mai Kilikia hanokia aeao. ²²Ia Iudeai weia Tirama ena marea haukia hanona au waira'u a'i te'iohina, ²³pou'u mo teona tetibaha, "Uainai e'oatanaka hauna nihore a'ikakauma weiana keapukuruna hauna bariu aba neiroro aina." ²⁴Ua buonai Tirama tebanamona au pau'uai.

Paulo Mai 'Abana Kipokia Ekia Aka Haeamo.

2 ¹Ihau harau haea bani teao murinai haeamona au Banaba ohi Tito tabaka'ana kipokia takara'au taeao Ierusalem. ²Tirama ena 'abi ao'uai ewaira tina buonai aeao Ierusalem, pou namona weiana rama haeai haukia herekiai airoro aina hauna robana ahuna. A'ikakauma haukia tipoki ainakia haukia kipokia hanona haia haiai ta'abi'abi aina kateraonaraona, pokina 'uainai airoro aina hauna mai bariu nairoro aina hauna e'u aka maikoina anina a'i meaha'i ta'una. ³I'abamai hauna Tito hanona Helene hauna ia a'i tebahi ahina itare kea'ina. ⁴Eka to'u aonai uaho'aba bai'oikia baika bunianai tetoto, te'itimanaka Keriso Iesu aonai mauri ha'ina hauna kate'iohina, ekia nuatae hanona rauhuhu ena ta'ara ia'ina'i patehoroti muenaka. ⁵Ekia raona a'i tabatohana, pokina pou namona 'abina tohana heremiai a'i mehaei.

⁶Ia weiakia apa'ua haukiai tibaonakia haukia (au here'uai hanona ekia haeai aha'i. Tirama hanona maearima hauani ena namo a'i nibatohana,) ba maearima weiakia pou namona au airoro aina hauna ahanai taba ha a'i tehore 'auna. ⁷Ia teihana Tirama aka ebena'u pou namona rama haeai haukia^a herekiai airoro aina ihobonamo Petero Iuda haukia^b herekiai eiroro aina. ⁸Tirama ena hiabuai Petero hanona iuhubeau haunai eao Iuda haukia herekiai, ihobonai mo Tirama ena hiabuai au hanona iuhubeau hau'uai aeao rama haeai haukia herekiai. ⁹To'u weiana kupuana haukia Iakobo, Petero mai Ioane Tirama aoko'o hoana neiana ebena'u hauna teiha tinana raninai, au mai Banaba ohi imamai tea'inakia uaho'aba hoana. Weiana tebatohana ai haumai hanona rama haeai haukia herekia kataeao, ia hanona Iuda haukia herekia kateao. ¹⁰'Abi hamona tehinana heremaiai hanona uraru haukia katarana apa'uanakia, 'abi weiana ta'i taeana ba aka neiana hanona au aba wa'i baha nababai to'ona.

^a 2.7 'ao itare a'i tea'ina haukia ^b 2.7 'ao itare tea'ina haukia

Paulo Antioka ai Petero Ebatana.

¹¹Ia Petero emai Antioka raninai maearima wairakiai abatana pokina ena babai hanona a'i ebero.

¹²Petero rama haeai haukia kipokia teaniani haeamo aonai Iuda haukia baika weiakia Iakobo euhunakia haukia tekara'au, ba Petero hanona emikiri herekiai ekapare, pokina ia weiakia itare tiba'ioi ainakia haukia eta'u ainakia. ¹³Iuda haukia baika abomo ia ena 'ubo weiana ihobonai bai'oi hoana tebabaina, ba ekia 'uboi Banaba abomo eahurea. ¹⁴Au babai weiana aiha poua poua namona 'abina tohanai a'i teka'aina, ua buonai ikoikiai wairakiai Petero abatana atibaha, "Oi hanona Iuda haumu, ia emu babai hanona matoha rama haeai haukia ihobonai nomiaho, ia Iuda haukia 'abana aha'i. Aea homanai rama haeai haukia kobahi ahinakia Iuda haukia ekia hoahoai katemiaho?"

Bamauri Hanona A'ikakaumai Nimai.

¹⁵Aika hanona Iuda ai harama toha hauka, ia 'ki'a hauka' aha'i, rama haeai haukia 'abakia aha'i. ¹⁶'A naha'iohina weiana maearima hanona rauhuhu ia'i taeana'i a'i kebero, ia Iesu Keriso kea'ikakaumana hanona kebero. Ua buonai aika abomo Keriso Iesu naha'ikakaumana, weianai kahabero Keriso ia'ikakaumanai ia rauhuhu ia'i taeana'i aha'i, pokina rauhuhu ia'i taeana'i hanona maearima ha a'i kebero. ¹⁷"Ia aika Keriso herenai eka bero nahatabuna, ia mo ki'a haukai kahawaira tina matoha rama haeai haukia ihobokiai raninai, weiana anina hanona Keriso ki'a haukai nibabainaka hauna, u? Ia weiana hanona aha'i 'akina. ¹⁸Kipo'u a'i ki'ana rauhuhuna kabakori muena raninai, au kipo'u kabatohana'u au rauhuhu nakabena hau'u mai ki'a hau'u. ¹⁹Au hanona rauhuhu paunai a'ari rauhuhu herenai, weiana buonai Tirama 'eunai kamauri. ²⁰Au hanona Keriso ohi matiu ibiri ropo 'ubinai aba teba'arinamai, ba au a'i namauri, ia Keriso au ao'uai namauri. 'A mauri neiana bariu hauani'uai namiaho aina hauna hanona Tirama Nahuna eraona'au aina'u kipona ena mauri ebena'u hauna na'ikakaumana buonai namauri. ²¹Tirama ena aoko'o hoana hanona a'i na'i ki'ana. Rauhuhuai bero paha'ina raninai, Keriso hanona aba e'ari 'abaea."

Bamauri Hanona Rauhuhu ai A'i Nimai.

3 ¹Galatia haumi e, wai hanona po'o haumi. Tai meai ebahureanimi? Wairami tohanai Iesu Keriso poua aba ikikipa haraina matiu ibiri ropoai teahu 'arina. ²Au nanuatae taba hamona mo katohina bena'u, Auba Robe toa'ina hanona rauhuhu toka'ai haraina paunai 'ao poua namona tona toa'ikakauma paunai? ³Wai hama na tupo'o aiho? Popounai mauri neiana Auba Robeai toa'i ramana, ia bariu hauani taburanai

katobapuana? ⁴Wai pou namona paunai tohau haiara 'ari hanona anina keaha'i? Ua kehoma raninai, aba tohau haiara 'ari 'abaea. ⁵Taba buonai Tirama ena Auba ebenimi, bata'u ta'u huri akakia ebabai baiatamiai? Ia rauhuhu toka'ai haraina paunai 'ao pou namona tona toa'ikakaumana paunai?

⁶Aberahamo tomoraonana. Puka robenai na terere aihona,
 “Aberahamo Tirama ea'ikakaumana,
 ena a'ikakauma paunai
 Tirama ehore bero haunai ebaona.”

Gen 15.6

⁷Ua buonai kato'jobina weiakia Tirama tia'ikakaumana haukia ikoikiai hanona Aberahamo nahuna. ⁸Puka Robena aba eiaha 'uaina rama haeai haukia katea'ikakauma hanona Tirama kehore berokia kehinana, ua buonai pou namona eiroroai 'uaina Aberahamo herenai, “Oi paumuai hanopaka maearimakia ikoikiai Tirama kebanamonakia.” ⁹Ua buonai weiakia mai ekia a'ikakauma haukia hanona Tirama nibanamonakia a'ikakauma hauna Aberahamo kipokia. ¹⁰Rauhuhuui temiaho haukia ikoinai hanona Tirama ena ururu ba'anai temiaho, pokina Puka robenai na erere aihona, “Rauhuhu pukanai terere 'abikia ikoikia a'i ke'ima haraina hauna hanona Tirama ena ururu ba'anai nemiaho.” ¹¹Aba ewaira tina harai rauhuhuui hanona hau ha a'i ebero Tirama wairanai, pokina Puka robenai e'abi,

“Bero hauna hanona a'ikakaumai
 kemaui.”

Hab 2.4

¹²Ia rauhuhu hanona a'ikakaumai a'i emai, terarua a'i teihobo, Puka robenai e'abi, “Maearima ha rauhuhu 'abikia ikoikiai keka'ai orena hauna hanona weiakiai kemaui.”

¹³Keriso aika eka ururu pumana ehoina, rauhuhu ena ururu aonai eba karahinaka, pokina Puka robenai aba ererena etibaha, “Matui 'ubina'i ti'ari haukia hanona Tirama ena ururu aonai.” ¹⁴Keriso ebakarahunaka pokina hanona banamo Aberahamo etauna hauna rama haeai haeai haukia katetabu ahina Keriso Iesu paunai, ua buonai aika eka a'ikakaumai hanona Auba Robe weiana e'abi'ua'ina hauna kaha'ina.

Rauhuhu Mai 'Abi'uai.

¹⁵Uaho'aba'u e, eka miaho maurina aonai ihaiha ha ma'ina hamaihana, maearima rua ekia 'abi'uai tebabaina teba'oruna murinai tai taba ha a'i kea'i parena 'ao ahanai ha a'i keahu'auna, ihobona mo kemiaho. ¹⁶Tirama ena 'abi'uai Aberahamo ena rama herenai ebabaina. Puka Robenai a'i e'abi 'ena rama herekiai' anina maearima bo'ona, ia e'abi 'ena rama herenai' anina maearima hamona, Keriso Iesu e'uahina. ¹⁷Na'uahina hanona neiana, Tirama 'abi'uai ebabai 'uaina ba ihau 430 teao murinai rauhuhu ebaibeni hauna kehore 'abi'uai weiana a'i kea'i parena 'ao a'i

keba'akaumana. ¹⁸Rauhubuaita itau kerama raninai, 'abi'uaiai hanona itau a'i kerama. Ia 'abi'uaiai Tirama ena aoko'o hoanai itau Aberahamo ebena. ¹⁹Ba rauhuhu ena aka hanona taba? Rauhuhu erama ena poki hanona beho 'ekakia kebakarahinakia. Ia hanona aneru temaiaina bairarao hauna imanai teutana akana erama, keao mo rama weiana e'uahi 'uaina hauna kemai. ²⁰Tirama ena 'abi'uai aonai hanona abira hamona mo nemiaho, weiana bairarao hauna ena aka aha'i, ia Tirama mo keikupai.

Rauhuhu Eaoainaka Keriso Herena.

²¹Rauhuhu hanona Tirama ena 'abi'uai kea'i ki'ana? Aha'i, aha'i 'akina. Rauhuhu weiana mauri ebaibeni raninai, bero hanona aba rauhubuaita pema. ²²Ia Puka Robenai e'abi hanopaka neiana maearimakia maikoinai hanona ki'a ekaiabunakia aonai temiaho. Weiana buonai tia'ikakauma Iesu Keriso herenai haukia a'ikakaumai 'abi'uai weiana katea'ina.

²³A'ikakauma neiana a'i emai baha raninai, aika hanona rauhuhu ekaiabunaka wapura hauka 'abana keao mo a'ikakauma kewaira tina. ²⁴Weianai rauhuhu hanona eka iha 'ini hauna 'abana kebaka'anaka Keriso herenai weia a'ikakaumai bero kebenaka. ²⁵Bariu a'ikakauma hanona aba emai, rauhuhu ena iha 'ini hiabuna herekai hanona aba eore.

A'ikakauma Keaoainaka Tirama Nahunai Kahaeao.

²⁶Keriso Iesu tua'ikakaumana buonai wai ikoimiai hanona Tirama nahuna. ²⁷Keriso kipokia toba hamomo 'uere robe toa'ina haumi ikoimiai hanona Keriso ena mauri habunina ihobona aba tobatotona. ²⁸Ua buonai wai hanona ha a'i ehaeai, Iuda hauna 'ao Helene hauna, ta'ara a'i hauna 'ao ta'ara a'i hauna aha'i, hau 'ao babi'e, pokina ikoimiai hanona hamona Keriso Iesu aonai. ²⁹Ba wai Keriso 'euna raninai, wai abomimo Aberahamo ena rama haumi, Tirama ena 'abi'uai barina hanona aba katotauna.

Aika Tirama Nahuna.

4 ¹Au na'uahina hauna neiana, miori hanona hamana barina maikoinai ke'aranakia, iamo miori papana raninai, ia hanona ta'ara a'i hauna 'abana. ²Eko'iko'i aonai, i'imana hauna mai iha'ini hauna ekia iha'ini ba'anai nemiaho keao mo hamana ebatohana ranina ketaina. ³Ihobona aika abomo miori papaka raninai hanopaka aubakia haeai haeai ta'arakia ia'ikiai haeao. ⁴Ia ranina tohana etaina aonai, Tirama nahuna euhuna, babi'e nuanai erama abomo Iuda ekia rauhuhu ba'anai erama, ⁵weiakia rauhuhu ba'anai haukia kebamaurinakia, weiana kea'inaka Tirama nahuna tohanai kebaonaka.

⁶Bariu nahunai toao buonai, Tirama hanona Nahuna Aubana euhuna emai aokai nemiaho, Aubana weianai aika Tirama nahaparina,

“Hama'u.”^c 7Ua buonai wai hanona ta'ara'i haumi aha'i, ia Tirama nahuna. Tirama nahuna tohami buonai barina ikoinai Aberahamo herenai e'abi'uai aina hauna wai 'eumi.

Paulo Aona Earo'ari Galatia Haukia Herekiai.

8Uainai Tirama a'i to'jobina raninai, wai hanona tirama tohakia aha'i haukia ekia ta'ara a'i haumiai toao. 9Ia bariu Tirama aba to'jobina, au na ma'abi aiho, Tirama abomo wai e'iohi harainimi, aehoma buonai katomue auba haeai haeai 'abe'abekia ekia namo aha'i haukia herekiai ekia ta'ara a'i haumiai katoao mue? 10Wai hanona wapu, nawa, ihau hamona to'una mai ihau ikoikiai tatukia mo emi beraura apa'uakiai tubaonakia. 11Au hanona wai paumiai ao'u niaro'ari, pokina e'u aka ikoinai heremiai hanona anina a'i meaha'i.

12Uaho'aba'u haumi e, au wai nanoinimi, au wai 'abamiai aba aeao 'uui ihobonai wai abomo rauhuhuui tomokarahi 'aba'uui tomoao. Here'uui hoa ha a'i tubarea. 13Wai to'jobina e'u inawa paunai heremiai amiaho pou namona airoroai 'uaina heremiai. 14E'u inawa ena pumai abaro'arinimi, ia a'i toiha haona'u, a'i toa'i ki'ana'u, aonai toa'ia'i haraina'u, Tirama ena aneru patobanamona 'abana 'ao Iesu Keriso patobanamona 'abana. 15Ua raninai mai aonamomi tomiaho, ia bariu emi aonamo aeana eao? Au a'jobina rani weianai mahami patoipa ahinakia au patobena'u na tohoma. 16Ia bariu au 'abi tohana nahinana heremiai buonai aba emi 'ou hau'uui naeao, u?

17Maearima weiakia ekia nuatae aomi kateana, ia ekia raona mai ekia nuatae hanona a'i tebero, ekia nuatae heremaiiai katokapare, katonuatae ainakia. 18Maearima aona keiani maearimana weiana kebanamona paunai, weiana hanona rani ikoinai enamo au heremiai pamiaho 'ao aha'i. 19Naha'u e, wai buomiaiai naro'ari, miori nirama haiarana 'abana, ua nahaiara aiho keao mo wai Keriso ihaihana ihobonai katoao. 20Au ao'u niaro'ari pokina heremiai kamiaho aia'u kabahaeaina kabarainimi, wai paumiai naraona raona 'ari.

'Abi Ibabatai Ihobona Hagara Mai Sara 'Abakia.

21Wai tai tonuatae rauhuhu ba'anai katomiaho haumi tomohina bena'u. Wai rauhuhu taba na ehoma hauna to'jobina, 'u? 22Puka Robenai na erere aihona, Aberahamo nahuna hanona rua, ha hanona atawana weiana ta'ara a'i babi'ena herenai ebaramana, ha hanona ia atawana tohana herenai ebaramana. 23Ia atawana ta'ara a'i babi'ena nahuna hanona harama ihobonai erama, 'a atawana tohana nahuna hanona Tirama ena 'abi 'uui miorina. 24Ori neiana hanona 'abi ibabatai 'abana.

^c 4.6 “Papa, Hama'u.”

Babi'e rua hanona 'abi'uai apa'uakia rua. Ha hanona Sinai oeonai emai ta'ara'i haukia ebaramanakia, ia hanona Hagara. ²⁵Hagara, ne'uahina hanona Sinai oeona Arabia aonai, ia hanona bariu rani neiana Ierusalem aiarana 'abana ia mai nahuna kipokia ikoikiai rauhuhu ena ta'ara'i haukia tiao. ²⁶Ia Ierusalem weiana kupai hauna hanona ta'ara a'i nia'i babi'ena Sara, ia hanona aika hinaka. ²⁷Puka Robenai aba ererena,

“One'one babi'emu e, koaonamo!

Beni haiarana a'i nuonobaina

babi'emu, koabe koio mai

eonamomu.

Pokina babi'e 'abaea

nahuna hanona kebo'o,

ia babi'e weiana mai atawana

hauna nahuna a'i kebo'o.”

Isa 54.1

²⁸Uaho'aba'u e, bariu wai hanona Isako 'abana Tirama nahuna, ia ena 'abi'uai ihobonai. ²⁹Rani weianai harama ihobonai erama miorina ehore miori weiana Auba Robe hiabunai erama hauna e'oatana, bariu abomo ua mo homana. ³⁰A Puka Robenai aea terere aihona? Na e'abi aiho, “Ta'ara'i babi'ena nahuna ohi mou'u ahinakia, pokina eatawa tohana nahuna barina hanona ta'ara a'i babi'ena nahuna ohi bari hamona a'i katewatena.” ³¹Ua buonai uaho'aba'u e, aika hanona ta'ara a'i nia'i babi'ena nahuna, ia ta'ara'i babi'ena nahuna aha'i.

Keriso Erubunaka.

5 ¹Keriso ehore aika aba erubunaka rauhuhu aonai a'i kahamiaho. Ua buonai tomokori 'ini, a'i temebiri muenimi rauhuhu ena ta'ara'i haumiai a'i tomoao marikina.

²Tomobahu, au Paulo wai naba'iobinimi, itare patoa'ina raninai Keriso ena aka hanona anina aha'i heremiai. ³Haeamona nahinabe pahih muenimi natibaha, itare kea'ina hauna hanona rauhuhu ikoikiai ke'ima harainakia kenamo. ⁴Wai rauhuhuai bero tutabuna haumi hanona Keriso 'eunai kipomi tokabe obonimi, Tirama ena aoko'o hoanai hanona aba tokapu. ⁵Ia aika hanona eka a'ikakaumai mai Auba Robe hiabunai nahabuabena Tirama bero kebenaran. ⁶Aika Iesu Keriso aonai kahahamomo raninai, itare 'ao itare aha'i ena haeai hanona aha'i, ia taba apa'uana hanona a'ikakauma, raona'auai niwaira tina.

⁷Wai 'uainai hanona a'ikakaumai toka'a harai ki'a baha, ia tai eharabunimi 'abi tohana ia'i taeanai? ⁸Aoani 'abikia weiakia hanona eaparinimi Tiramana herenai a'i timai. ⁹Katoraonana, “Bakupu muramurana papana nihore parawa maikoinai nibakupuna.” ¹⁰Au hanona Obiapaka na'ikakaumana kebarainimi wai raona haeai ha a'i katoa'ina. Baoao baoao nibenimi hauna hau aea homana ia Tirama kehore 'arana kebena.

¹¹Uaho'aba'u e, itare nairoro aina raninai aehoma buonai ti'oatana'u? Weiana petohana raninai Keriso ena matiu ibiri ropo kairoro aina hanona atetuana aha'i. ¹²Au nanuatae weiakia itareai tibatetuanimi haukia hanona patekatu'a pateao atetua tabana patekabe obona.

¹³Uaho'aba'u e, Tirama eaparinimi hanona kerubunimi. Erubunimi haumi hanona hauani akakia ki'a obokia a'i katobabai, ia raona'auai ha ha kipomi katobarai barai haemo. ¹⁴Rauhubu ikoinai aba ebahamomonakia 'abi neianai, "Heremuai hauna koraona'au aina oi kipomu nuraona'au aini'o 'abana." ¹⁵Kato'ima 'ima harainimi wai kipomi emi baiarai mai emi 'au bo'o 'au bo'oai kipomi a'i tomobaorenimi ta'una.

Auba Robe Buabuana Mai Hauani Ena Hoahoakia.

¹⁶Ua buonai na'abi, Auba Robe emi mauri ke'uai aina raninai hauani ena nuatae akakia ki'a obokia a'i katobabai. ¹⁷Pokina hauani ena nuatae akakia hanona Auba Robe nihao abuna, Auba Robe ena nuatae akakia abomo hauani nihao abuna, ia terarua tibaitaeai, ua buonai wai patobabai haukia a'i tubabai. ¹⁸Auba Robe wai ke'uai ainimi raninai, wai hanona rauhuhu ba'anai a'i katomiaho.

¹⁹Hauani ena hoa hanona emahanai ki'a baha. Taba neiakiai, nabau, raona 'opukia, maha porepore, ²⁰kaiba'uku ikutiaina, mea, bai'oata, 'au, wamuru, opuere, 'ao'aea, baihabapa'a, ba'iobi bai'oikia, ²¹raona ki'a, inu 'ari, ripuripu, ba babai uahomakia ikoikiai. 'Uainai abahinabe pahihinimi, bariu haemona nahinabe pahihi muenimi, aka uahomakia tibabai haukia hanona Tirama ena obia aiarana a'i katetabu ahina.

²²Ia Auba Robe eka mauri ke'uai aina buabuana hanona raona'au, aonamo, baibua, bapahihi, aoko'o, rabo harai, aia o'o, ²³'aiaunu mai aokiro. Neiakia ikoikiai hanona rauhuhu a'i ni'oatanakia. ²⁴Keriso Iesu ena maearima hanona huanikia mai ekia hoa ki'a obokia mai ekia nuatae ki'a obokia aba ikoko'au matiu ibiri ropo 'ubinai.

²⁵Auba Robe mauri aba ebenaka buonai, ia mehore eka mauri me'uai aina. ²⁶Aika a'i kahapa, 'abaka kipokia a'i kahaba opuerenakia 'ao a'i kahawamuru ainakia.

Emi Puma Katobua Haehaeha.

6 ¹Uaho'aba'u e, hau ha beho aonai etoto raninai, aomia Auba Robe niaka haumi ha kohore aomu namonai kobaberona. Ia oi abomo kipomu ko'ima haraini'o, baihobo a'i mea'ini'o marikina. ²Emi puma katobua haea haea, taeara neianai hanona Keriso ena rauhuhu katoa'i taeana. ³Taba aha'i hauna mo niraonana ia hanona maearima apa'uana ha raninai, ia kipona ni'oina. ⁴Ha ha kipomi emi babai kato hobonakia, taba obabai haraina hauna hanona kipomu koapaini'o, ia a'i koaoaina maearima wairakiai. ⁵Maearima ikoikiai kipokia ekia puma katebuanakia.

⁶Tirama ena 'abi emarereaina hauna hanona ena taba namokia ikoinai ena ba'iohi hauna ohi katebina'anakia.

⁷Kipomi a'i katohaorea, maearima ha Tirama a'i kebapo'ona. Maearima ube ebatona ihobonai mo anina kea'ina. ⁸Ba hauani ena nuataeai ebato bato hauna hanona hauani herenai 'ari ketabu ahina, ia Auba Robe 'eunai ebato bato hauna hanona Auba Robe herenai mauri banai banai ketabu ahina. ⁹Aka namona ibabainai a'i kahahau hororo, aika a'i kaha 'abe'abe raninai, eueu ranina kemai aonai buabua namona kaha'ina. ¹⁰Ua buonai namo nahatabu ahi ranikiai maearima ikoikiai herekiai namo kahababainakia, ia a'ikakauma haukia herekiai hanona namo kahababai harainakia.

Banamo 'Abina Orena Mai Bahuba'ari.

¹¹Rererere rarikia neiakia katoihanakia au ima'uai arerenakia tiwahi heremi. ¹²Weiakia t̄enuatae atakia keapa'ua haukia tibahi ahinimi itare katoa'ina, ekia poki tohana hanona Keriso ena matiu ibiri ropo paunai maearima a'i teme 'oatanakia. ¹³Weiakia aba tetarenakia haukia mo, rauhuhu a'i tika'aina, ia wai t̄enuatae ainimi itare katoa'ina, hauanimi paunai katebaro'e. ¹⁴Au taba ha a'i kapai 'abaeana, ia eka Obiapaka Iesu Keriso ena matiu ibiri ropo ikupaiana mo kapaina, Keriso paunai hanopaka e'ari au here'uai, au abomo aba'ari hanopaka herenai. ¹⁵Itare 'ao itare aha'i terarua aniki'a aha'i, ia taba apa'uana hanona rama mahamahana. ¹⁶Tirama ena baibua mai aoko'o hanona raona neiana tia'i taeana haukia ikoikiai herekia, abomo Tirama ena maearima weiakia aubai Isaraela haukiai tia'o haukia herekia.

¹⁷E'u 'abi puanai hau ha a'i mebaro'arina'u, pokina au hau'uai mani'a t̄emiaho tibaihana au Iesu ena ta'ara'i hau'u.

¹⁸Uaho'aba'u ikoimiai e, nabahuba'ari eka Obiapaka Iesu Keriso ena aoko'o hoana ahamiai kemiaho. Amen.